

Wrkapm katnukg a Pol nira eng Timoti Yangkipm a la ela ep

Timoti pa kil pikekg akwap wris anti Pol, kolpa atom Pol nirantel wrkapm kil. Kil lanaki Timoti pa eng mpa kil ntokg nikgwalpm wor. Kil la Timoti mpa ukipma itni titnongket eng ake mpa kil elngen a angkli yangkipm a la Sisas Krais pa. Kil mpa ngkli yangkipm ute a Maur Wailen ti kolti. Kol tu melnum lkel wleket a kalkuten pa, kil ake mpa elngen pa. Kil mpa rki kalkuten pa itni titnongket ik kwap a Maur Wailen alkel pa. Kil ake mpa elng nungkulkg pa rmp i itning yangkipmok tiur a tu melnum tiur a alump nikgwalpm raimpe paipm a kolpa. Yangkipm tiur a kolpa antiwe antokg paipm maur wusok a melnum. Wor wrisen eng kol a Timoti kil ik won kit i atn a rpma wor a Pol pa atom kil kitila. Pol kil pikekg arki kalkuten ukipma itna titnongket, a wa ipma akilen pa pikekg rka kupuk meen wor a wasrongen wrongkwail.

Timoti mpa ikwap titnongket eng palng melnum akwapel wor a Maur Wailen

(Klapm 1-4)

Pol uk wor Timoti

¹ Kupm Pol, kupm melnum wokgen a Krais Sisas. Pikekg Maur Wailen kil alkil ai takweiy-opm ak wasrongen a kil alkil ai, atom ukwawopm la kupm laron niki tu wrong kin kipman la Maur Wailen kil pikekg yapon yangkipm la mentepm ukipma kutnun Krais Sisas pa, kil mpa lko yaprekg watin a rpma wor yongkyong.

² Timoti, yek alkupm, kitn pa kol warim akupmen a kupm plan ipma wor wasrongenteitn, kupm nira wrkapm kil eng kitn pake. Kupm asen Yan Maur Wailen a Wailen Krais Sisas a mentepmen pa, eng mpa tuwekg plan ipma wor ngklinseitn a reinseitn atom ntokg ipma akitnen pa rki kupuk meen wor.

Pol uk wor Maur Wailen eng Timoti

³ Kupm oklala naki Maur Wailen miningkranen pa kupm akwonalmponentin rpma akangklei wang a kupm ukwor Maur Wailen. Kil Maur Wailen a tu mamikgamin mansan akupmen, ok wusok atuwen pikekg aktitnongketel la tu pikekg rka rukis wor atom tu kapor kilko aleinsel kolpa kul, atom kupm am wa kapor kilko aleinsel kol tu pake.

⁴ Kupm akwonalmacen ikgakg akitnen a pikekg ungkwani pa, kolpa atom kupm wasrongen paipm la riweitn pen, eng mpa kupm rpmi wor uwi ipma atopen wor.

⁵ Kupm wonarpme kitn pa la, kitn pikekg ukipma Sisas Krais aklale irir kol a pikekg mamikg mayen alkitn Lois, a man alkitn Yunis

ukipma pa. Ti kupm ariwe la kitn am wa ukipma kolpake.

Mentepm ake mpa numpaipm eng laron yangkipm wor a Maur Wailen pa

⁶ Kupm ariwe la kitn ukipma aklale. Pikekg Maur Wailen alkeitn kweikwei titnongket wor wor a Maur Wor pa ak wang a pikekg kupm elng wam eleweitn oklala naki Maur Wailen ak angklinsein pa. Kolpa ti kupm la ngkiteitn won eng kitn rkul kweikwei pa titnongket ik ik kwap pa kolpa iye kai o! Pa kol wakg waiketn a kitn karpen atom naruk al wail pa.

⁷ Maur Wor a pikekg Maur Wailen alko pa, pa ake Maur Wor a antokg mentepm ngkark pa, kalpis. Pa Maur Wor a alko titnongket, a kil Maur Wor a ak angklin mentepm ti plan ipma wor wasrongan tita, a kil Maur Wor a antokg mentepm wontrakole ikgalen atn a rpma a oklala almentepmen ti ariworwor.

⁸ Kolpa ti ake mpa kitn numpaipm eng laron Wailen Sisas amentepmen pa. Wa ake mpa kitn numpaipm eng kupm a pikekg laron yangkipm akilen, atom tu awiyopm rpma wan tipmining ti. Kitn mpa ntiwopm rki kaikuten eng laron yangkipm wor a la Sisas pa, Maur Wailen kil mpa lkeitn titnongket a ngklinsein pa.

⁹ Maur Wailen kil melnum a pikekg awiyo a amprinso atom akwewo, lala mentepm itni wrong kin kipman akilen. Ake kil awiyo atnen kwap wor kolai a mentepm ti ak pa, kalpis. Palpa

kil pikekg akwonalmcen yiprokgen ur alkil ai atom kil planto ipma wor areinso kolpa. Pikekg ak ep lmpiwen ai pa, Maur Wailen kil takwei mentepm ti ep ise, a kitnong a kanokg a kweikwei wrongkwail pa pikekg kil antokg katnukg. Kil alkil pa planto ipma wor areinso kolpa atom kil alko Krais Sisas pa la ik ngklin mentepm wrong kin a kipman tike.

¹⁰ Ipma wor a kil pikekg lawen la reinso pa, ak wang ti am kil ak pa angko wunong ise. Pa am la Krais Sisas a pikekg nar akarmpento pake. Kil angketen titnongket a Amo a alok yapo melnum pa plalng yat ise, wa antokg mentepm rpma malepmen itna klalen a ikga rpmi yongkyong. Mentepm am pikekg yangkipm alkil pa armpento wam pake.

¹¹ Maur Wailen kil takwei kupm ti la kupm melnum wokgen akwapel akilen, wa kupm melnum a laron, a wa kupm melnum a kaling plan yangkipm wor a armpen wam mentepm wrong kin a kipman ti.

¹² Am yiprokgen pa atom ari kupm arki kalkuten kil, pake kupm ake numpaipm atnen pa, kalpis. Eng ntei, kupm ariwe worwor melnum a kupm ukipma pa. Wa kupm ariwe worwor la, kil antiwe titnongket a ikga iken yipmingki ikglen yangkipm wor a kwap a pikekg kil uk kul wam akupmen ti eng ikga itni wor kolpa kai ngko wang wail a ikga Krais kil yaper nar.

¹³ Kitn rkul yangkipm ute wor aklale a pikekg kupm kaling plantein pa, atom elng pa itni

kol mrangkum wor a kitn la kitila ik kiling tu wrong kin kipman pa irir kol pikekg kupm kaling planteitn pa. Kitn pa a Krais Sisas, atom kitn ukipma kil, wa kitn wa plan ipma wor wasrongen tu wrong kin kipman, ti kitn rkul nikgwalpm pa ik kiling planten iye kolpa kai o!

¹⁴ Maur Wailen pikekg ariwe kitn pa wor wor kolpa atom kil elng yangkipm wor pa elng kai wam akitnen pa la kitn ikglen. Pa kweikwei wor wrisen. Ti kitn mpa iken yipmingki ikglen riworwor. Maur Wor akilen a rpma mentepm ti pa mpa wa ngklinsitn eng kitn ikglen riworwor pa.

¹⁵ Kitn ariwe pa, tu wailet a anong kanokg a Esia pa am pikekg plelng yirokg lawopm a atnuurngkopm kai plalng ise. Ti Pikelus a Ērmokenes pa tuwekg am wa atnuurngkopm kai ise.

¹⁶ Pake Onesiporus pa ake atnuurngkopm, kalpis. Kupm asen Wailen eng mpa kil plan ipma arein wor ngklinsel Onesiporus nimpokgen kin a watnom alkilen pa. Kupm rpma wan tipmining ti, pake kil ake wa numpaipm atom atnuurngkopm pa, kalpis. Kil yek pikekg wli wli ariwopm atom ak titnongketel ipma akupmen ti anti watipmen atom kupm rpma wor.

¹⁷ Ak wang a kil pikekg kul rpma anong wail Rom ti pa, kil pikekg nikgwalpm arkekgen pilpilen akoropm kai pa kai pa kaingkai, kil kul ariwopm om.

¹⁸ Kupm asen Wailen pa eng mpa kil reinsel a plan ipma arein wor ngklinsel ik wang wail a ikga ntokg yangkipm itni Wailen pa. Ti kitn pa pikekg

ariwe worwor pake a kil angklinsopm wail or ya yawen ak wang a kupm rpma kai Epesus pa.

2

Arki kalkuten rapon nampokgen wrongmanto

¹ Timoti warim yek alkupm, Krais Sisas pa kil plan ipma wor angklinsein kolpa ti kitn elng kil pa itni ik titnongketel kitn ti.

² Yangkipm kweikwei wrongkwail a kitn atning a pikekg kupm laron a kaling plan pa, wa tu kin a kipman wailet atning ari la pa am yangkipm ute akrale am pake. Ti kitn mpam wa itning kitila wa niki lupmen tu melnum a kitn ariwe worwor la tu antiwe ikga iken yipmingki ikglen riworwor pa, wa tu antiwe ikga wa kiling plan tu tiur ai wa iye kolpa kai.

³ Kitn itni melnum wor a almpwrong a Krais Sisas rki kalkuten ik ik kwap kolen men ti.

⁴ Melnum wor a almpwrong pa kil ake mpa nikgwalpm rken kweikwei wrongkwail a mentepm ak arpme pa. Kil mpa won itni ilmpwrong ai kolti kai, eng mpa melnum itna ep a alekgen tu kai almpwrong pa, kiporng yangkipm la kil pa melnum wor a almpwrong.

⁵ Wa melnum a la nti tu ikoporen tita eng la uwi kweikwei pa am wa kolpake, kil mpa kutnun riworwor ya alkil a ak kiporen tita pa a tu yapon la tu mpa kutnun kolpake. Kol ake kil kutnun ya alkil a ak kiporen tita pa riworwor pa, pa kil ake mpa uwi kweikwei ur a tu ak kiporen tita pa, kalpis.

6 Wa melnum a akwap tumplowis itna wring pa, kil pa mpa uwi okipma a tu angket tuwai ampreing pa ep pake, a tu a akwap lpmaaken pa, tu mpa uwi kutnukg.

7 Kitn ikwonilmpen ik nikgwalpm pa irongke yangkipm kla a wet kupm la pa! Eng ntei, kitn ik kolpa pa, Wailen mpa kil ntokg nikgwalpm akitnen pa umpen, eng mpa kitn uwi riwe yangkipm yiprokgen wrongkwail a kupm la pa.

8 Kitn mpa ikwonilmpen Sisas Krais a pikekg amo atom wa wrekg rpma pa, a wa kil pa kulung wris a melnum tukgunakg Tepit pa, pa kol a kupm laron yangkipm wor pa lanakepm nakepm pa.

9 Kupm am arki kalkuten wailet auraur atnen a kupm angkli angkli yangkipm wor a la Krais pake. La mpa kai elngen kolpa ari kalpis, wa tu wa arpmentopm kurngkurng la kupm ti la kupm ti melnum trangkowet paipm ur atom tu yapo nepmwampel kupm ti awiyopm aye kai rpma wan tipmining ti. Pake yangkipm a Maur Wailen pa tu ake antiwe mpa yipo pa, kalpis.

10 Aklale, yangkipm a Maur Wailen pa tu ake antiwe mpa yipo, kolpa atom ari kupm ake wa elgnar rpma pa. Kupm itna titnongket arki kaikuten wrongkwail pa, eng mpa kupm wa ik ngklin tu wrong kin kipman a pikekg Maur Wailen takweiyen pa, eng mpa tu ukipma Krais Sisas pa atom kil wa ikuwiyen eng alkilen. A wa kupm wasrongen la tu ikga kaino ntiwel rpmi anong klalen wor pa rpmi yongkyong.

11 Yangkipm kil pa yangkipm aklale wrisen:

- "Kol mentepm nti Krais imo pa, mentepm mpa wa wrekg ntiwel rpmi pa.

12 Kol mentepm ntiwel itni titnongket rki kaikuten wrongkwail pa kolpa iye kai pa, pa mentepm ikga wa ntiwel itni wailen ikglen kweikwei wrongkwail.

- Pake kol mentepm lam nang akilen pa, kil ikga wa lam nang a mentepmen ti yat.

13 Kol mentepm yipon yangkipm la mentepm akilen, ari wa mentepm kipor yangkipm a mentepm yapon pa, pake kil pa ake antiwe a kipor yangkipm alkilen a kil yapon pa, kalpis. Kil pa ake melnum a kansil pa atom mpa kil kipor yangkipm a kil yapon pa."

Timoti kil mpa iken kwap eng ikwap kitila nikgwalpm a pikekg Maur Wailen alkel pa

14 Kitn mpa ngkit wonel tu wrong kin kipman pa eng mpa tu won rpme yangkipm kil. Kitn mpa naren Maur Wailen pa la ngkengken titnongket la tu elngen a ak yangkipm pa rapon alilakel tita la yiprokgen a yangkipm pa manman pa. Yangkipm a kolpa pa ake antiwe ak angklin melnum ur, kalpis. Pa ak antokg ipma a tu melnum a atning yangkipm pa kai paipm.

15 Kitn mpa plan kitn alkitn ti Maur Wailen pa ikwap riworwor, eng mpa Maur Wailen pa mpa kiporngkeitn yangkipm uwi wor laweitn, la

kitn melnum akwapel wor a ake numpaipm eng kwap wor a kil ak pa. Wa kil mpa uwi wor laweitn la kitn melnum akwapel wor a kaling plan yangkipm aklale alkilen pa ute wor kolti.

¹⁶ Kitn mpa itni watin tukwleikgen yangkipm ok tiur a tu tiur la a ake katnun nikgwalpm a Maur Wailen pa, wa yangkipm kansil tiur a tu lala pa yangkipm aklale pa. Eng ntei, tu la yangkipm ok kolpa kai pa, ikga ik rkolngken iye kolpa kaingkai kai tu utnuurng Maur Wailen pa.

¹⁷ Yangkipmok a oklala a kolpa pa, ikga kai yela tu wrongkwail itning, kol i watet ur a angket al numpwam a melnum kaingkai kai paipm pa. Yangkipmok a oklala a kolpa pa, am Imeneus ekg Piletus melnum wekg pa oklala pake.

¹⁸ Tuwekg la kolpa la, tu melnum a pikekg amo kaingkai pa, am pikekg wa wrekg wrekg ise. Ti yangkipm a tuwekg la kolpa pa, pa tuwekg at-nuurng yangkipm ute aklale a mentepm ukipma pa kai ar ise, atom pa tuwekg wa ak arkolng tu wrong kin a kipman wailet a ukipma pa wa angko kai paipm. Pa kol tuwekg tikale wan pa elngnar prapm paipm ise.

¹⁹ Pake ong kalnten titnongket a pikekg Maur Wailen kil uwen pa tongtong itna, antiwe ngkat wan pa itna titnongket. Wa kil nira yangkipm ur ela ong pa ak amprin eng alkilen pa la kolkil la, "Wailen pa kil ariwe worwor tu wrong kin a kipman alkilen pa ise." Wa yangkipm ur pa wa kil nira kolpa la, "Mla ur a laron kil alkil pa la kil a Wailen pa, kil mpa uk yirotg nikgwalpm

wrongkwail a ake katnun nikgwalpm a Maur Wailen kil wasrongan pa."

20 Rpma wan wail pa ake kuntuk mangkei wail wail akalkilel kolti rpma wan pa, kuntuk wakgen ikgur ikgur pa wa rpma nampokgen. Kuntuk tiur pa anongen a pikekg ak ak kanokg mang ti, pa kol kuntuk wil, kuntuk kark, kuntuk kok, kuntuk mangkei, a kuntuk tiur pa mringen. Kuntuk wakgen pa tu elng itna eng ak antokg okipma al akangklei wang, wa kol kuntuk mangkei wail wail pa tu elng itna eng ak antokg okipma wail wail al ak wang tiur.

21 Kol melnum ur kil ungkwan nikgwalpm raimpe a ake katnun yangkipm ute aklake a Maur Wailen pa, pa kol kil atnurng wrpmungkaung a yapowel pa kai takwlelkgentel atom kil wirng no itna rukis kukula wor pa, kil pa palng kol kuntuk mangkei wor a akantokg antokg okipma wail wail. Atom yan a wan pa elng kuntuk pa rpma ak namput kwap wail wail pa kolti atom pa ikga ngklinsel. Kuntuk pa itna numprampen eng yan a wan pa ikga uwi eng ik ik kwap wailet wor wor aur aur.

22 Ti Timoti, kitn mpa ngkom nilokgen nikgwalpm wasrongan a kipm warimpen a la ngkli rkul tu kin a nikgwalpm a uren la ntokg kweikwei pa. A kitn mpa nikgwalpm rkekgen eng kutnun nikgwalpm kolkil:

- rpmi ute wor kolti,
- ukipma kutnun Krais itni titnongket,
- plan ipma wor wasrongan mla ur,
- wa nikgwalpm pa rki kupuk meen wor.

Kitn itn nti tu wrong kin a kipman a nol nikgwalpm atuwen kukula rukis wor pa wa tu a kipm kapor kilko alein alein Maur Wailen pa, kipm kimeket mpa nikgwalpm rkekgen kutnun nikgwalpm kolpake.

23 Kitn itni watin tukuleikgen tu melnum a rka alilakel tita yangkipm ok a titnowen a tu ake ariwe kuina ur a tu la pa. Kitn ariwe pa, yangkipmok a kolpa pa ak arkolng kamel aye kai eng akle or tita.

24 Melnum a akwap orngwatneikgen Wailen pa
 - kil ake mpa ikle melnum ur aki or melnum ur pa.
 - Kil mpa plan nikgwalpm wor tu wrongkwail,
 - wa kil mpa kiling plan tu wrong kin kipman pa riworwor,
 - melnum ur kil ntokgtel paipm ur kolai pa, kil mpa rkul ipma itni titnongket,

25 kil mpa lok tu melnum a talpulng yangkipm ute aklale pa nimpokgen ipma meen wor.

Atom Maur Wailen mpa wa ngklinsen ikwap kawor ipma atuwen pa, atom tu ikga wa pleling ipma pa, a wa uwi riwe yangkipm aklale akilen pa.

26 Tu pikekg Satan alekg ampei pa la tu ngkowe ntokg kuina ur kutnun nikgwalpm akilen ti. Pake kol tu uwi riwe yangkipm aklale a Maur Wailen pa, nol nikgwalpm atuwen pa ikga wa umpen wontrakole, atom ikga ngketen ampei a Satan a yapowen pa atom tu ikga wirng no itni kukula wor.

3

*Ik wang umpuwen pa tu melnum ikga plelng
yirokg la Maur Wailen ti atom ntokg nikgwalpm
paipm paipm*

¹ Timoti, kitn mpa wonrpme yangkipm kil: ik wang umpuwen pa kaikuten wail wail paipm ikga palngto.

² Ik wang pa ikga wonet paipm, tu wrong kin kipman ikga lupm nikgwalpm paipm aur aur kolkil:

- tu ikga wasrongen tu alntu ti kolti,
- nikgwalpm wail a tu pa ikga rkekgen la uwi marpm wailet,
- tu ikga wam rka nol ngkit nang a tu alntu ti, a rku nang a tu mla ur ai,
- wa tu ikga la paipmel a ik nokgel Maur Wailen,
- wa tu ikga nungkulkget a tulpulng yangkipm ok a mansan,
- wa tu ikgake uk wor tu mlaur a angklinsen kuina ur pa,
- wa tu ikgake ngkirken Maur Wailen pa atom rpmi orngwatneikgen kil pa.

³ Tu ikgake uk ipma wor wasrongen mlaur,

- tu ikga lupmen nikgwalpm paipm a tu ak nampokgen mla ur pa rpmi kolpa rpmi pake,
- tu ikga ik uwepel mlaur,
- wa tu ikgake ntiwe ngkeng lok ipaar nikgwalpm wasrongen atuwen a wrekg tit-nongket tilpen la ntokg kuina ur pa, kalpis.
- Wa tu ikga ok la wam wampor,

- wa tu ikga uwi wrong manto lan nikgwalpm
wor wor wrongkwail.

4 Tu ikga ningkail tu melnum pa kai ngko ampei
a tu angkli pa,

- tu ikga wrekg uren itatu kutnun nikgwalpm
alntuwen ti kolti.
- Tu ikga ngkit nangkel tu alntu ti la tu ti
melnum wailen nang arke.
- Nikgwalpm wail atuwen pa ikgake rken Maur
Wailen pa, kalpis, nikgwalpm wail atuwen pa
ikga rken eng ntokg kuina ur la ik itopen tu
alntu ti kolti.

5 Tu ikga kinsil kipor kilko ilein Maur Wailen ti
plan ik numpalk enen ti kolti wa tu ikgake riwe
ketn ketn ur titnongket a Maur Wailen a kol a
ikwap kawor ipma wunen atuwen pa, kalpis.

Ti kitn mpa itni watin tukwuleikgen tu melnum
a kolpa.

6 Tu melnum tiur kolpa a laron yangkipm manet
pa tu ikga ik palk ipaar kai kawor wan a tu
kin a antokg paipmpaipm. Tu kin yek yek pa
ake antiwe titnongket a arku angkeng nikgwalpm
wasrongen wrongkwail alntuwen a alok al tuk-
gunakg kai pa kai pa atom tu rpma nampokgen
ipma kalkuten. Atom tu ikga ik palk ipaar kai
kawor wan a tu kin pa, tu kol ampei a aut rpma
mengkel tu kin pa rkolngken iye kai la kutnun
nikgwalpm atuwen.

7 Tu kin pa la uwi riwe kweikwei a mla ur kiling
planten, pake nol nikgwalpm atuwen ti ake wa

umpen wor antiwe mpa tu uwi riwe yangkipm
aklale a Maur Wailen pa.

⁸ Tu melnum a ikga ik palk upaar tu pa, ikga
ikwap kolen Sanes ekg Sampres a pikekg ekg ak
pa. Tuwekg pikekg awi wrong manto lan Moses.
Ti tu ti ikgam wa ik kolpake, tu ikga uwi wrong
manto lan yangkipm aklale a Maur Wailen ti. Nol
nikgwalpm atuwen pa ikga kai titnowen paipm
kolti, atom tu ikga kai ar utnurng ya a ukipma
katnun Sisas pa.

⁹ Pake nikgwalpm a tu ikga ik kolpa, pa ikgake
wa tu ntokg kolpa itni kai watin pa, ikga tu ntokg
itni kai waiketn kolti, atom nikgwalpm titno a tu
pa ikgam palng kai ngko wunong wrongkwail ri
pake. Am kolen nikgwalpm titno a pikekg Sanes
ekg Sampres ak pa pikekg palng angko wunong.

*Timoti mpa rkul yangkipm wor a Maur Wailen
pa tongtong nimpokgen kweikwei wrongkwail a
pikekg Pol kaling plantel*

¹⁰ Pake kitn ti pa, kitn ikgake kol tu melnum a
alok tu wrong kin kipman aye kai ar pa, kalpis.
Kitn pa pikekg antiwopm atn a rpma, a atning a
ari, a awi ariwe atn a rpma akupmen pa worwor,

- wa kitn ariwe yangkipm na na a pikekg kupm
kaling plan tu wrong kin kipman pa.
- Wa kitn ariwe nikgwalpm yiprokgen wrongkwail
a kupm akwonalmacen pa.
- Wa kitn ariwe a kupm ukipma Krais pa.
- Wa kitn ariwe a kupm arkul ipma itna titnongket
arki kaikutten wrongkwail pa.

- Wa kitn ariwe nikgwalpm wail akupmen a plan ipma wor wasrongen tu mla ur ai pa.
 - Wa kitn ariwe kwap a kupm ak angkai ai kulngkul pa kupm ake elngen pa kalpis.
- 11** Kitn ariwe kalkuten wail wail a pikekg tu or ungkwantopm alkopm wleket itna anong wail Antiok, Aikoniam a Listra pa.

Woi, pa pikekg kalkuten wail wail a wleket wakget paipm pikekg kupm arki itna anong pa! Pake pikekg Wailen kil alkil pa angklinsopm kaikuten wrongkwail pa, kolpa atom kupm rpma wor.

12 Am aklale pake, pa ake pikekg tu antokg paipmel kupm wris ti kolti pa, kipm mla ur a la kai kirpon Krais Sisas pa atom kutnun nikgwalpm a Maur Wailen pa, kipm ikgam wa rki kaikuten a wleket kolpa yat pake, tu ikgam or ungkwantepm lkepm wleket kolpa yat pake.

13 Pake tu melnum paipm, a tu melnum a ningkail tu melnum pa kai ngko ampei a tu angcli pa, tu ikga wa lmpil lok tu wrong kin kipman pa iye kai ar utnuurng yangkipm aklale pa. Wa tu pa wa lmpil lok tu tiur ai wa iye kai ar kolpa iye kai paipm wrisen.

14 Pake Timoti kitn pa, kitn mpa rkul yangkipm nikgwalpm ariwe wrongkwail a pikekg kitn awi wa kitn ariwe la pa ute aklale ampake. Eng ntei, pa kitn ariwe men a pikekg kaling planteitn pa la men ti melnum a kaling plan kuina ur a ute aklale kolti.

¹⁵ Wa ngkaten ak a kitn a warim wasek ai kul pa, kitn am awi ariwe yangkipm wrkapm a laron nako Maur Wailen pa ak ai kul ise. Kolpati kitn mpam rkul yangkipm pa titnongket itni kolpa itni pake! Yangkipm a ela wrkapm pa antiwe titnongket a alkeith ariwe eng kitn ukipma Krais Sisas eng mpa Maur Wailen uwkiyeitn iye kul eng alkilen.

¹⁶ Maur Wor a Maur Wailen alkil pikekg ikan yangkipm pa atom tu melnum nira ela wrkapm pa, pa yangkipm wrkapm wor a ak angklino kolkil:

- pa ak kaling planto yangkipm aklale,
- wa ak akle la karkurng mentepm a antokg paipm,
- wa ak alok nikgwalpm a raimpe pa kul kai ute wor,
- wa ak kaling planto la mentepm mpa itn a rpmi kutnun nikgwalpm a Maur Wailen wašrongen pa.

¹⁷ Am yangkipm pa ak angklino eng mpa mentepm wrong kin kipman a Maur Wailen pa uwi nikgwalpm ariwe wrongkwail wor wor atom pa ik numprampen mentepm ti antiwe ikwap wrongkwail wor wor.

4

Timoti mpa itni titnongket ngkli yangkipm a Maur Wailen

¹ Krais Sisas kil ikga nar ngko wunong, atom kil ikga itni melnum tukgunakg ikglen kweikwei wrongkwail pa itni yongkyong, atom kil ikga

ntokg yangkipm nimpokgen tu melnum a rka ti wa tu a amo kaingkai ai. Ti kupm naren Maur Wailen a Krais Sisas pa la tilpeitn kolpa la,

² kitn mpa ngkli yangkipm wor a la Krais pa niki tu wrong kin a kipman pa.

- Kol tu wasrongan la itning yangkipm aki tu kirken pa, kitn ake mpa elngen pa, kitn mpa ngkli yangkipm pa kolpa kai pake.
- Kitn mpa ikle la kurkurng tu melnum a antokg paipm,
- kitn mpa wa la loken,
- wa kitn mpa wa lken nikgwalpm weten wor wor.

Kweikwei wrongkwail pa, pa kitn mpa rkul ipma kiling planten ik ipma meen wor kolti.

³ Ti kitn itning, ikga ik wang kutnukg pa, tu wrong kin kipman ikgake la itning yangkipm ute aklele a tu kaling planten pa, kalpis, tu ikga kirken wrisen. Tu ikga elng nungkulkg rmpen itning kuina ur a tu wasrongan la itning ti kolti. Atom tu ikga ukwen tu melnum tiur ai wli kiling planten yangkipm a tu alntu ti wasrongan la tu a itning pa.

⁴ Atom tu ikga uk yirokg yangkipm aklele pa, a tu ikga wa elng nungkulkg rmpen eng itning yangkipm kansil a pikekg tu rka akorla atom kaling planten pa.

⁵ Pake kitn ti pa, kitn mpa rpmi wontrakole lokipaar ikglen kitn alkinti eng kweikwei wrongkwail, wa itni titnongket rki kaikuten a wleket a palngteitn pa. Wa kitn mpa ikwap a

ngkli yangkipm wor a la Krais pa niki tu wrong kin kipman. Kitn mpa ikwap a Maur Wailen pikekg alkeitn pa riworwor kolpa kai plalng.

Pol wreren eng a imo om

6 Kupm ikgake rpmi eng lkeitn nikgwalpm ngklinseitn iye or pa kai. Walmpopm akupmen am ungkwan eng al wor uk Maur Wailen tike. Ti wang akupmen am kul wreren eng kupm a imo utnuurngkeitn tike.

7 Kupm ukipma Wailen Krais Sisas, a akwap a pikekg kil alkopm pa katila nikgwalpm a kil pa ariworwor kolpa kulngkul, kul elngen tike. Pa kolen kupm pikekg pirng titnongket wulmpa itna ya anti tu akoporen tita kolpa kulngkul, kul angko wrik a kul elngen ti ise.

8 Kweikwei wor wor a melnum pirng ep kai ngko wrik a tu pirng kai elngen pa la uwi pa, pa am nimprampen elngtopm itna ise. Wailen, melnum a katila nikgwalpm ute alkil rpma atning atning yangkipm a mentepm wrong kin kipman pa, kil ikga lkopm kweikwei wor wor pa ik wang wail a ikga mentepm ntokg yangkipm itni kil pa. Kweikwei wor wor pa pati kolkil: Wailen ikga ukwewopm la kupm melnum ute wor. Kil ikgake wa uk kweikwei wor wor kupm wris ti pa, kalpis. Kil ikga wa uk tu melnum a plan ipma wor wasrongen paipm la ikga riwel atom rpma nungkwangentel la kil nar palng ngko wunong pa.

Pol la Timoti kai riwel pinterng

9 Timoti, kitn ikor ya ur pa wa itatu pinterngen wa kul riwomp!

10 Eng ntei, nol nikgwalpm a Temas pa arken kweikwei wrongkwail a itna kanokg ti atom kil am atnurngkopm kai anong Tesalonaika ise. Wa Kresens pa am wa kai anong kanokg Kalesia, a Taitus pa am wa kai anong kanokg Talmatia ise.

11 Luk alkil wris ti kolti antiwomp rpma kul kilke. Ti kitn la kul pa, kitn kul ikyakur Mak pa kipmekg kulntopm o! Eng ntei, kil pa melnum wor a ikga ngklinsopm ikwap pake.

12 A Tikikus kil pa kupm ikga ukwawel kai Epesus kilke.

13 Kitn la kul pa, kitn kaino uwi apm a nowe eng wropuk a pikekg kupm ermpa kaino wan a Karpus kaino Troas pa atom iye nar. Wa uwi wlkgok palk a oklala elewe pa wa wrkapm akupmen pa wa iye nimpokgen nar, ampur kitn woniketen wlkgok palk a aye nar pa.

14 Aleksanter pa, melnum a antokg kweikwei ak wes watet pa, kil pikekg alkopm kalkuten watipmen. Pake ikga Wailen kil ikilmpe nikgwalpm a kwap wrongkwail a kil ak pa kul.

15 Melnum pa pikekg awi wrongmanto lan yangkipm a mentepm angkli pa, kolpa ti kitn ti mpa wa itn ukig riwe melnum pa.

16 Pikekg ak wang lmpiwen a kupm itna antokg yangkipm a tu arkiwomp pa, ake pikekg melnum ur itnantopm yirokg angklinsopm antokg

yangkipm pa, kalpis. Tu wrongkwail pikekg atnuurngkomp plalng. Pake kupm oklala naki Maur Wailen eng ake mpa kil ik ker uwiye paipm a tu pikekg atnuurngkomp pa atom ikga kil ikilmpe pa.

¹⁷ Tu pikekg atnuurngkomp, pake Maur Wailen kil alkil pa pikekg atnentopm wrer atom alkomp titnongket, eng la kupm ikwap a laron yangkipm wor akilen a la Krais pa niki tu wrong kin kipman wrongkwail a ake a Suta a rka ti itning. Kolpa atom Maur Wailen kil alkil pa pikekg awiyopm aye kai takwleikgen ok a nimpa tilpmingen wrongen a la nampopm imo pa. Atom am kupm akwap kulngkul, kuļ elngen angko tike.

¹⁸ Am wa kolpake, ti Wailen kil alkil pa ikga wa uwiyopm iye kai tukuleikgen nikgwalpm paipm na ur a tu la la wa ntokg paipm kupm ti. Wa kil alkil ikga uwiyopm iye kaino kitnong rpmi anong wor a kil alkil itna tukgunakg ikgalen kweikwei wrongkwail pa. Ti mentepm ngkit nang klalen wakget akilen pa ikngklei wang itni lantlan iye or pa kai! Aklale.

Pol ukwor a la alupm alupm eng plalng

¹⁹ Ti Timoti, kitn laniki Prisila ekg kipman alkil Akwila pa, a kitn wa laniki Onesiporus nimpokgen kinwatnom alkil a tu a antiwen rka wan wris a pa la kupm nikgwalpm arkenten rka pa.

²⁰ Erastus pa kil rpma kai Korin pa apa. Pake Tropimus pa numpet kolpa atom kupm atnurngkel rpma kai Miletus ise.

21 Ti kitn ikor ya ur pa pinterng itatu kul o! Kitn rpmi mpenet pa, wang kupuk a wripm mring mring wail ikga el ik ngketenteitn atom kitn ikgake kul.

Yupulus, Putens, Linus, Klotia nampokgen tu melnum a mentepm ukipma Krais pa kimeket a rpma kul kil pa tu la kupm nira nikeitn la nikgwalpm a tu pa arkenteitn rka pa.

22 Kupm asen Wailen pa la kil ntiweitn rpmi, wa plan ipma wor alkil pa ngklin kipm kimeket.

Yangkipm akupmen am kai itna ketn kolpake.

**Kla Weten A Maur Wailen Lam
The New Testament in the main dialect of the Urim
language of Papua New Guinea
Nupela Testamen long tokples Urim long Niugini**

copyright © 2024 SIL Papua New Guinea

Language: Urim

Dialect: main

Contributor: Wycliffe Finland and Finnish Evangelical Lutheran Mission

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-12

PDF generated using Haiola and XeLaTeX on 12 Sep 2025 from source files dated 12 Sep 2025

2e27dc3a-67e0-5642-ba90-804f3df7d2c5